

## CHURWALDEN

La vischnanca ha approvà  
dus credits per la fracziun da Malix

La radunanza communal da Churwalden ha approvà gievgia saira in credit per il providiment d'aua a Malix. Tranter auter duai dar in nov reservuar e plinavant duai vegnir renovada ina tschiffa-da da funtauna. En tut munta il credit a 2,6 milliuns francs. Ultra da quai ha la radunanza approvà in credit da 270'000 francs per in nov stgaurament en la chasa da scola a Malix. (rtr/fmr)



La scola da Malix survegn in nov stgaurament. La radunanza communal ha approvà in credit persuerter. FOTO PHILIPP BAER/SOMEDIA

## HOCKEY SIN GLATSCH

## HCD gudogna gist anc cun 4:3

Il club da hockey da Tavau ha gudagnà l'emprima partida dal playoff quartfinal cunter l'EV Zug 4:3. Las davosas duas minutas ha il club grischun anc pudì volver il giu il venderdi passà. Grazia als gols da *Brendan Lemieux* e *Yannick Frehner* aifer las ultimas 87 secundas hai anc dà ina victoria per il HCD. Fin là era il HCD en dischavantatg. Suenter dus terz manava l'EV Zug schizunt cun dus gols. Pir en la 51avla minuta ha *Simon Ryfors* reduci la differenza. Spert ha Zug lura puspè procurà per l'avantatg da dus gols ed en la 54avla minuta ha *Michael Fora* procurà per il 2:3.

Il proxim giu dal playoff quartfinal (best of seven) tranter il HCD e l'EV Zug ha gi lieu ier, dumengia saira (suenter la fin da redacziun). (rtr/fmr)

RECLAMA



Tuttas plazzas da dimora per viagiants en il Grischun èn per lung da la A13, sco per exempel la piazza a Panaduz.

FOTO OLIVIA AEBLI-ITEM/SOMEDIA

## «I mancan plazzas da dimora»

Il president da «Radgenossenschaft der Landstrasse» pretenda ch'ì vegnia stgaffida ina nova piazza da dimora en il Grischun per il pievel viagiante. Malgrà ch'ìl Chantun renconuscha l'impurtanza da questa pretensiun, n'èsi betg simpel da chattar in lieu adattà.

ANNALISA DEVECCHI (KEYSTONE-SDA)/FMR

Actualmain datti en il Grischun quatter plazzas da dimora e da transit per ils viagiants svizzers: a Cuira, Panaduz, Cazas e Ziràn-Reschen. Ina tschintgavla piazza è situada a Domat, nua che viagiants dad auters pajais vivan. Per cumparegliar: En l'entira Svizra datti 47 da quellas plazzas. En il Grischun sa chattan tut las plazzas per lung da la A13 en vischinanza dad axas da colliaziun. «Il meglier fiss per nus ina nova piazza tranter Cuira e Maiavilla», ha ditg *Daniel Huber*, il president da «Radgenossenschaft der Landstrasse», envers SRF. Tenor in studi da la fundaziun «In futur per ils viagiants svizzers» da l'onn 2021 duvrassan las cuminanzas viagiantas dals Sinti e Jenics en Svizra ulteriuras 20 fin 30 plazzas da dimora e 50 plazzas da transit.

## Divers motivs per las refusas

La pretensiun per ina nova piazza da dimora en il chantun Grischun n'è betg nova. En ils ultims onns è vegnida fatga in'evaluaziun. A quella èn suandads discurs cun las vischnancas en trais regiuns per lung da la Val dal Rain. Fin ussa n'èn dentant vegnids fatgs nagins ulteriurs pass. «I dat vischnancas che dovràn dapli spazi per lur abitantas ed abitants, autras vulan realisar projects d'industria u da turissem e puspè autras din che las plazzas per viagiants n'hajan betg prioritad sin l'agenda politica», ha declerà *Thomas Kollegger*, manader da l'Uffizi da

«Il meglier fiss per nus  
ina nova piazza tranter  
Cuira e Maiavilla.»

Daniel Huber, president da  
«Radgenossenschaft der Landstrasse»

vischnancas dal chantun Grischun, envers l'agentura da novitads Keystone-SDA. Las difficultads èn vegnidas explitgadas durant ina dieta che la fundaziun «In futur per ils viagiants svizzers» ha organisà avant in pèr dis a Cuira.

Thomas Kollegger ha fatg endament a la dieta ch'ìls obstachels per las vischnancas sajan vegnids reduciads ils ultims onns tant sco pussaivel: «Il Chantun sustegna las vischnancas finanziarain cun construir plazzas da dimora. L'onn 2024 ha il Cussegl grond plinavant decidì che il Chantun surpiglia il custs socials.» Lezza giada aveva la Regenza proponì che tut las vischnancas surpiglian solidaricain il custs, questa proposta è dentant vegnida refusada dal Cussegl grond.

## Responsabladad istorica dal Grischun

I para che la solidaritad manchia. Il Grischun ha dentant ina responsabladad istorica en-

vers ils Sinti e Jenics. En il rom dal project «Uffants da la via» da la Pro Juventute dals onns 1926 fin 1972 èn 586 uffants vegnids stratgs or da lur famiglias ed intermediads en chasas d'orfens u famiglias da tgira. La mesadad dad els era dal chantun Grischun. La translocaziun sfurzada d'uffants e la destrucziun da famiglias viagiantas èn vegnidas renconuschidas l'onn passà dal Cussegl federal sco crim cunter l'umanitad envers ils Jenics ed ils Sinti.

La presidenta da la fundaziun «In futur per ils viagiants svizzers», *Rosmarie Quadranti*, ha numnà a chaschun da la dieta a Cuira la protecziun da las minoritads sco «indizi da qualitad per in stadi da dretg». Che plazzas da dimora e da transit vegnian messas a disposiziun, saja la premissa fundamentala per il survival dal pievel viagiante. «Senza quellas n'è la vita vaganta betg pussaivla e vegn impedida», ha ditg er il president da la regenza grischuna *Martin Bühler*.

Il Chantun na frunta dentant betg mo sin obstachels planisatorics, mabain era sin pregiudizis envers ils viagiants. Las plazzas da pussar sajan dentant in enritgiment cultural per ina vischnanca, ha explitgà l'antier president communal da Panaduz *Christian Theus* a la dieta. Cura ch'ì dat ina nova piazza da dimora en il Grischun, ha il president da la regenza grischuna betg pudì dir. «Mes giavisch è che nus possian far in pass enavant ils proxims onns», ha ditg *Martin Bühler*.

## Suenter 35 onns prenda Flurin Camenisch cumià

La fin d'avrigl 2026 va Flurin Camenisch en pensiun. El ha lavurà 35 onns en il Museum da la natira dal Grischun a Cuira. Durant blers onns ha il zoolog e pedagog da museum declerà la natira dal Grischun ad uffants e creschids.

RTR/FMR

Suenter che *Flurin Camenisch* ha finì ses studi da biologia, ha el sco emprim cumenzà a lavurar sco scolast secundar. Cun 30 onns ha el lura surpiglià la piazza sco zoolog e pedagog en il Museum da la natira dal Grischun a Cuira. Quella piazza era vegnida stgaffida nov dal Chantun. Flurin Camenisch è damai stà l'emprima persuna ch'ha fatg questa lavur.

«Jau hai al cumenzament stuì crescer en quella lavur. Jau hai lavurà a l'entschatta cun giuvenils e tuttenina era il public scolinas. L'emprim mument hai jau pensà: Tge fatsch jau cun quels pitschens? Oz èsi ina gronda fascinaziun da lavurar cun pitschens e gronds. Mintga

classa è autra», ha raquintà Flurin Camenisch envers RTR.

## Nov capitel da la pensiun

En il museum ha Flurin Camenisch lavurà surtut en l'intermediaziun. El ha manà classas da scola tras il museum, ha fatg guidas per persunas creschidas e famiglias ed ha organisà eveniments. El ha declerà animals, spazis da viver e connex en la natira, e quai adina en moda simpla, visibla e cun grond entusiassem. En tut quels onns ha el ramassà blers bels e leghers muments: «Mintga giada datti novas situaziuns, dumondas u era respuestas, tar las qualas ch'ins pensa: Mamma mia, quai è uschè bel.»

Ses temp sco zoolog e pedagog en il Museum da la natira a Cuira va suenter



Flurin Camenisch lascha suenter 35 onns enavos fastiz en il Museum da la natira dal Grischun. FOTO OLIVIA AEBLI-ITEM/SOMEDIA

35 onns la fin d'avrigl 2026 a fin, ma la fascinaziun per la natira e per ils animals resta probabel per adina. Lungurus na daventa il nov capitel da la pensiun damai segir betg per Flurin Camenisch: «Jau poss ir sin in prà e poss star là in mez di, e quai è per mai grond divertiment.» Ed er en il museum vai vinavant. La successura per Flurin Camenisch è gia fixada. Quella persuna cumenzà lura il settember 2026.

Mesemna, ils 25 da mars 2026 guarda Flurin Camenisch enavos sin 20 onns e 75 referats «NaturSpur». Cun la pensiun da Flurin Camenisch finescha era quella retscha da referats. Il davos referat ha lieu da las 17.00 fin las 17.45 en la sala B12 spher il Museum da la natira dal Grischun. Il dumber da plazzas è limità e reservaziuns n'èn betg pussaivlas.